

el consier, provedador a l'Arsenal, e disse el bisogno si ha di danari per l'Arsenal per cosse preste, ch'è ducati 8000 in zercha, et hanno domandà ducati 4000 di 50 milia hanno trovà nel Consejo di X, *tamen* non hanno potuto averli; pertanto insieme con sier Alvise di Prioli suo colega vol chiarir al Consejo, e fe' lezer la poliza di quello bisogna a l'Arsenal, et messeno tutti una parte di sospender il quartiron vien a le zente d'arme questo Zugno, e li danari siano dati a l'Arsenal per questo bisogno. Et sier Antonio Trun provedador, savio dil Consejo, messe una decima presa a pagar per tutto el mexe con ducati 10 per 100, e li danari siano deputati a l'Arsenal. Et andò in renga et parlò, non è modo più presto di aver danari.

361 Poi parlò sier Alvise di Prioli sopradito, provedador a l'Arsenal, dicendo decime è cosse longe, e bisogna questi danari in 8 zorni etc. Et cussi sier Hironimo da Pexaro et lui messeno che 'l Colegio in termene di zorni 3 debano venir con le sue opinion di danari per l'Arsenal, soto pena di ducati 1000 da esser seossa per li Provedadori a l'Arsenal, la qual sia di l'Arsenal; et in questa opinion intrò *etiam* li altri Savii dil Colegio excepto, sier Antonio Trun, che volse la decima. Andò le parte: 22 dil Trun, 167 dil Pexaro e altri nominati, e questa fu presa.

Fu poi leto 4 opinion di Savii in materia pecuniaria senza nominar chi mette la parte, aziò il Consejo intendi et habi tempo da pensar.

La prima, che tutti quelli non hanno dato le soe condition in nota le vadino a dar a li X Savii in termine di . . . sotto pena etc.; et che 'l sia electo 30 zentilhomeni dil corpo di questo Consejo, quali debano 15 atender di là da Canal, et 15 di qua da Canal, e tansar tutti in modo di fazion et se pagi . . . per 100 di quelli harano di cavedal, et duri per anni 5, con altre clausule.

La seconda, che sia electi 12 preparatori, quali preparano i lochi et monasterj dove si habino redur numero 45, *videlicet* 15 per camera, quali habino a tansar tutta la terra, et debano star seradi, nè partirsi mai fino non harano expedito el tutto, e poi si veda le tansè di tutte tre camere, e fata la summa si toy el terzo e quello sia la soa angaria; con molte clausule *ut in ea*, che è il modo si fa li estimi in Terra ferma, et è opinion di sier Daniel Renier savio dil Consejo solo; e di questo el Consejo se la rise.

La terza, che sia eleto 26 per scurtinio etc., quali 10 sia ordenarii et 3 di rispetto, zoè la mità atendi di là da Canal, et l'altra mità di qua da Canal, e tansi di perso tutti da ducati uno fino ducati 150, qual sia

per una volta a l'anno e non più, con certe clausule; et è opinion di sier Pandolfo Morexini savio a Terra ferma solo.

La quarta vol la parte terza, con questo li stabeli da ducati 20 in zoso si stimi a raxon di 8 per 100 e dati in suso 5 per 100; con molte clausole, *ut in ea*, et è opinion di sier Lorenzo Venier el dottor savio a Terra ferma.

Et fo licentiatto il Pregadi senza far altro, a ore 23.

*Di Ragusi, di Giacomo di Zulian, di 6 Zugno*, come ho dito di sopra. Scrive esser venuto *lettere di oratori di Ragusi, è a Constantinopoli, di 26 Mazo, etiam* per do olachi venuti, qual portano lettere el Signor havia levato dil sanzachà dil paese di Charzego quel bassà era, il qual va in l'Anatolia al sanzachado di l'Amasia, e in suo loco vien Aiam Cassan per sanzacho. Scriveno ditti oratori l'armada esser tutta in ordine e preparada, nè manchava altro che el *fiat* dil Signor a levarsi, zoè l'ordine, et era fama le dovesse andar a la impresa di Rodi.

*A dì 17, Domenega*. La Signoria, vicedoxe sier 361 • Andrea Mudazo, con li 4 oratori Papa, Franza, Ferrara e Mantoa et li deputati zoveni al pranzo dil Doxe, ozi che si fa per San Vido, vene in chieixia aldir messa, dove era sier Andrea Griti procurator, eleto capitano zeneral di mar, et il signor Thodaro Triulzi governador zeneral, et li infrascripti procuratori: sier Antonio Grimani, sier Antonio Trun, sier Domenego Trivixan el cavalier, sier Lorenzo Loredan dil Serenissimo, sier Alvixe Pixani et sier Hironimo Justinian. Mancò sier Zacaria Gabriel et sier Zorzi Emo, qual non va mai poi il caso di suo fiol, poi ha coroto per la nuora che morite poco è, et altri assa' zentilhomeni et parenti vestidi di seda e di scarlato. El dito Capitano zeneral havia una veste di veludo paonazo a manege . . . fodrà di ormesin. Et zontà la Signoria, fo dito la messa. Poi la Signoria andò con li oratori et zentilhomeni al pranso, et da poi vene el prefato Zeneral col Governador e tutti i Procuratori et assa' altri zentilhomeni, venuti per questo, al bancho di l'Armamento, dove era preparato da ducati . . . milia, *videlicet* 3 marchi di oro et do di monede tolti di danari dil Monte nuovo, *etiam* di banchi ad imprestedo per far tal demonstration, dove sentavano sier Vetur Michiel et sier Bortolo Contarini provedadori sora l'Armar. El Zeneral sentò un poco, poi da tutti fo acompagnato a caxa, et ognun si parti; *etiam* il Governador zeneral andò a lo alozamento suo a disnar. Restò *solum* alcuni